

四庫全書

集部

欽定四庫全書

誠意伯文集卷十一

明 劉基 撰

寓情集一

河傳

江上作

江上風過水生紋  
煙裏斜陽半曛  
雨聲不堪客耳聞  
紛紛夢魂迷斷雲  
夢斷天涯歸路杳  
天欲曉殘月窺牕  
小木蘭舟蘆葦秋汀洲  
藕花相伴愁

滿庭芳

詠荷花

楊柳煙銷梨花雲散瑤臺別是風光翠霞深處誰舞白霓裳三十六宮向曉鳳綃擁紅粉成行珠簾外風翻瑞葆驚起紫鴛鴦含情空悵望衾寒鄂渚佩冷瀟湘怨凌波塵襪不度銀潢只恐青娥嬌妬相將見葦白芹黃淒涼也一天墜露明月在池塘

玲瓏四犯

台州作

白露點珠明河生浪秋光看又一半翠衾知夜永夢冷

愁孤館南樓數聲過雁西池桂花零亂歲序如何江山  
若此贏得鬢霜滿傷心漫回愁眼見蛩吟蔓草螢度  
荒瞳淚隨黃葉下事逐浮雲散滄波衮衮東流去問誰  
是登樓王粲菊綻籬邊賦歸來恐晚

江神子

霏霏輕雨弄秋光野煙蒼晚風揚征雁將愁分付與寒  
蟬窻外聲聲啼到曉人不寐夜何長滄江波浪去茫  
茫莫思量使心傷籬外黃花只作舊時香歌罷歸來深

對酒今古事總淒涼

浪淘沙

秋感

江上晚來風烟藹濛濛  
白蘋吹盡到丹楓  
流水落霞衰草外  
離恨無窮  
極目楚雲東  
愁見歸鴻拒霜相倚夕  
陽中  
露重月寒芳意歇  
知為誰紅

浪淘沙

感事

天際草離離  
鴻雁南歸冷烟凝  
恨鎖斜暉蝴蝶不知身  
是夢飛上寒枝  
惆悵倚闌時  
總是傷悲絕  
憐紅葉似

芳菲清露自凋楓  
自落沒箇人知

淡黃柳

台城秋夜

江城夜寂何處吹羌笛  
城上月高風淅淅  
翻動林梢敗葉一片琅玕下空碧  
倦遊客鄉關暮雲隔  
漫回首盼歸翼  
想柴門流水依然在  
白髮叅軍青衫司馬休向天涯淚滴

調笑令四首

秋雨秋雨  
窗外白楊自語  
夢回月在空廊  
燈影朦朧夜

涼涼夜涼夜露冷芙蓉花謝

沙燕沙燕別去幾時重見汀洲芳草纖纖細雨微風捲  
簾簾捲簾捲人與碧梧俱晚

白露白露點我庭前芳樹樹中有箇棲鴉啼到銀蟾影  
斜斜影斜影照見羅幃夢冷

紅樹紅樹粧點天涯秋暮淡烟衰草黃昏露冷啼蜚斷  
魂魂斷魂斷明日玉臺霜滿

菩薩蠻

越城晚眺

西風吹散雲頭雨斜陽却照天邊樹樹色蕩湖波波光  
豔綺羅 征鴻何處起點點殘燬裏月上海門山山河  
莽蒼間

漁家傲

江上秋來惟有雨江城九月猶炎暑泉湧中庭苔上柱  
深閉戶莎雞露泣寒蟬語 征戍誅求空軸杼千村萬  
落無砧杵玉帳悠悠閒白羽愁正聚亂鴉啼破樓頭鼓

小重山



城上高樓接海椒疎林藏不盡欲棲鴉回廊曲檻別人  
家征鴻外風冷夕陽斜燈暗鼓三過望中煙隱樹月  
籠沙白雲如夢繞天涯梧桐雨和淚滴寒莎

虞美人

有感

秋來日日煙含雨不肯收殘暑小桃錯認是春回盡把  
枝頭紅綠向人開白雲流水青山遠門掩蒼苔晚草  
間蜂蝶未須忙後夜雲英和月結成霜

喜遷鶯

殘夜

畫角斷篆香清斜月淡疎櫺露寒霜冷鵲頻驚歸夢不  
曾成湖上數聲沙鳥河漢漸低水杪起看北斗待天  
明雲白日華生

水龍吟

次韻和陳均從吹簫曲

秦臺人去無蹤空餘綠樹連天表瑤京路遠緱山夜永  
離愁縈繞露咽玄蟬霜淒白鶴月寒煙裊想孤鸞舞罷  
碧桃花盡長是怨多歡少夢裏駟車過處見蒼梧九  
峯青小脩篁染淚滄江流恨年年不了廣莫風悲昭華

玉冷聲沈雲杪又扶桑日上靡萍光散蓬池春曉

水龍吟

雞鳴風雨瀟瀟側身天地無劉表啼鴉迸淚落花飄恨  
斷魂飛繞月暗雲霄星沈煙水角聲清裊問登樓王粲  
鏡中白髮今宵又添多少極目鄉關何處渺青山髻  
螺低小幾回好夢隨風歸去被渠遮了寶瑟絃僵玉笙  
簧冷冥鴻天杪但侵階莎草滿庭綠樹不知昏曉

浣溪沙

處州葉叔安溪南草堂

細草垂楊村巷幽白沙素石引溪流青苔磯上有扁舟  
門外好山開罨畫屋頭新月學簾鉤窻風一榻似清  
秋

長相思

晚興

晚風清晚雲輕雨意將成又不成斷赧天際明  
舊恨  
盈新恨生立到樓頭河漢傾無人知此情

踏莎行

瓶水知秋池荷怨晚有人樓上吹清管月明夜寂却堪

聽可憐剛被風驚斷  
楚澤吟悲槐根夢短  
江山處處傷愁眼  
欲憑青鳥寄殷勤  
波濤無地蓬萊遠

江神子

西風吹樹簾涼初露如珠月如梳  
鴻雁無情不帶半行書  
漫倚闌干成小立  
人老也倩誰扶  
中庭梧葉待霜疎  
有棲鳥夜相呼  
門外一池寒水落芙蓉  
為問閒愁還幾許多  
似草不勝鋤

青杏兒

獨自倚闌干西風起玉宇清寒夜深月轉長河曲疎螢  
度竹啼蜚依草涼露溥溥莫把素琴彈冰弦上商冷  
宮殘萬牛不挽東流水悠悠碧落茫茫雲海疊疊憂端

摸魚兒

傷春

問春光尚餘幾許傷心前夜風雨天桃豔杏都吹盡蘭  
茝變成荒楚春欲去但渺渺青煙白水迷津渚多情杜  
宇有恨血滋宵哀音破曉千叫一延佇蓬萊路還是  
鯨濤間阻神仙縹緲何處瓊樓玉殿深留景不見下方

塵土誰最苦  
暝色帶雙飛  
燕子歸無主  
那堪訴與又暗  
壁殘燈重門轉漏鳴咽夢中語

虞美人

桃花半折臘脂  
莖鶯語東風裏  
坐來簷日轉牆陰  
時見黃蜂帶粉出  
花心長煙不散  
萋萋草人與春俱老  
知人老去願春遲  
無奈滿庭風絮促春歸

沁園春

白芷生香綠萍抽葉  
還是清明有殘絲絆  
雨危芳怯露

梨雲困蝶絮雪迷鶯髮短心長時殊事異覩物如何不  
動情愁來也怕東風無賴鷓鴣先鳴莫思身外虛名  
綿上荒田草樹平任龍蛇歌怨桑榆煙盡山枯石死畢  
竟何成富貴浮雲窮通定命守分安常百慮輕和誰說  
又鴉棲高柳月照層城

惜分飛

蝶醉蜂迷鶯不語門掩一庭花雨春事無多許野雲江  
樹誰為主縱有垂楊千萬縷難綰教春莫去愁到傷



心處數聲杜宇青山暮

沁園春

和鄭德章暮春感懷呈石末元帥

萬里封侯八珍鼎食何如故鄉奈狐狸夜嘯腥風滿地  
蛟螭晝舞平陸成江中澤號鴻苞荆集鵠輒盡平生鐵  
石腸凭闌看但雲霓明滅煙草蒼茫不須踽踽涼涼蓋  
世功名百戰場笑揚雄寂寞劉伶沈湎嵇生縱誕賀老  
清狂江左夷吾關中宰相濟弱扶顛計甚長桑榆外有  
輕陰乍起未是斜陽

憶秦娥

次石末公韻

陽春月蜂喧蝶競芳菲節芳菲節風狂雨橫魂消心折  
鳳凰臺上簫聲絕長洲苑裏光陰別光陰別有人愁  
歎淚珠成血

驀山溪

晚春

清明過了簾幙餘寒淺芳樹不勝風任流水飄紅去遠  
煙昏雨暝天觀海雲低鶯意懶蝶魂銷花盡成秋苑  
遊絲落絮特地相縈絆無計網春暉漫贏得遮人望眼

登高凝睇欲寄一封書  
鴻路阻豹關深日暮空腸斷

憶秦娥

春雨歇庭花撩亂飄紅雪  
飄紅雪一川芳草數聲鶗鴂  
長煙渺渺青冥闊江湖波浪行人絕  
行人絕雲山迢遞夢魂飛越

念奴嬌

詠蛙

池塘過雨有許多蛙  
蛙為誰彊聒乍寂還喧如聚訟  
觀縷宮商爭發嘔啞蠻歌兒離鞦唱  
頰齒相敲齧可人幽

夢驚回天水空闊 最好白石清泉被渠翻倒作蹄涔  
丘垤蚯蚓螻蛄無智識相趣草根嘈噴坐井持願當車  
怒目幾欲吞明月子陽安在至今莫辨優劣

八聲甘州

詠蛙

問青蛙有底不平鳴真箇為公私向污泥曳足蹄涔接  
腋缺甃持願斷續儀同歌吹羹沸綠萍池鐘鼓難成響  
而況塤箎 曾記江湖煙雨被枕邊謹噪刺耳如錐擁  
輕衾孤坐愁到曉雞時道巴猿聲聲是淚細看來不似

此聲悲應知得灑灰著令千載無疑

倦尋芳慢

詠雨

翠霞暎日柱礎生雲衣袂先冷石燕飛時天與亂山俱  
暝稍見如絲隨風細漸看密灑滄江迥倚闌干恁昏昏  
過了清和光景小樓外榴花間竹可恨紅英飄墜苔  
徑霧罩陽臺悽惻夢魂難醒階下決明憂爛死草根得  
意惟蛙黽正蕭條又沈沈戍鼓夜凉人靜

渡江雲

初夏即景

麥秋晨氣潤嫩涼院落細雨乍晴時定巢新燕子睡起  
雕梁對立整烏衣庭空晝寂但盡日簾幙低垂歸去來  
不堪重賦兩鬢漫成絲傷悲斜陽難繫逝水無回想  
佳期應未愁正濃如何消遣惟有心知瑤琴調苦弦先  
絕任冷落玉軫金徽凝望處啼鴉飛上高枝

阮郎歸

曉寒楊柳綠如濡園林新雨餘紫苔成暈上階除日高  
庭院虛官況懶世情疎斷腸芳歲徂暮雲不見北飛

魚路遙難寄書

蘇幕遮

次韻和劉宗保

日斜時山盡處綠水朱霞隱映雲間樹  
鴻鵠冥冥鳥鵲暮海闊天高翼短迷征路  
路多岐情沒緒想極生悲欲語難成句  
忽憶登樓懷土賦愁著心頭淚落如零雨

八六子

晚思

到黃昏悄無情緒淒涼又掩重門盼草際殘陽易盡雲  
中征雁難憑漫勞夢魂淵明三徑猶存白鶴不歸華

表烏鴉自滿荒村念過眼芳菲總埋泥土縱然回首可  
堪凝睇傷心處處蓬蒿廢井時時煙雨啼猿更何言蒼  
苔漸深淚痕

攤破浣溪沙

次劉宗保韻

燕子巢成倦不飛綠陰鳴蜚靜頻嘶拄杖獨穿芳草徑  
立多時池面紫錢荷點點枝頭青彈杏離離更愛葵  
花紅粉豔似崔徽

江神子

同前



沅湘煙雨夏生寒怕江千有離魂蕙圃蘅蘭蕪穢有誰  
看愁絕洞庭雙帝子風颯颯珮珊珊 釣天虎豹守重  
關隔人間寄音難腸斷春光正美却凋殘聞說桃源今  
不見何處好把漁竿

燭影搖紅

重五

筠粉初銷海榴花外絲絲雨青槐綠柳又新蟬淒咽黃  
鸝語煙草蒼茫何處想當年三閭故楚蕙蘭蕭艾蘅茝  
蓬蒿菜施無數 細葛香羅有人衣袂隨風舉游梟不

作太官羹玉燕空雕虎永晝庭陰自午一時間愁情萬  
緒寸腸柔脆未了傷今那堪懷古

生查子

槐雲顰墜鬟柳露酣啼眼深院有佳人坐惜芳菲晚素  
手理瑤琴曲罷空長歎佇立望青霄愁永青霄短

長相思

山悠悠水悠悠水遠山長處處愁那堪獨倚樓憶歸  
休怎歸休細雨微風冷似秋綠陰啼栗留

驀山溪

詠螢

晚晴池館月淡煙籠水草際却嬉微漸游揚隨風四起  
拂雲穿霧搖亂玉繩光高又下滅還明點綴林梢藥  
漢宮遙夜鐙影深羅綺莫近繡簾飛滿階苔無人有淚  
蓬窻淒冷留取照韋編天祿閣校書時藜杖清暉似

滿江紅

次韻和石末元帥

華表孤雲還應是當初相識回望處煙塵滿地燕鴻南  
北過眼浮榮蝴蝶夢縈身薄宦猩猩屐笑村童不認主

人翁呼為客 鯨鮓起滄溟  
折藩籬外生仇敵 悵高門  
廣廈鹿場麋跡大澤猶纏蛇  
豕氣暘烏未放乾坤白細  
看來還自有青山長如昔

阮郎歸

題畫扇

白蘋風起夕陽微小舟衝浪歸  
江湖却落釣魚磯天寒  
紅葉飛 彭澤菊首陽薇  
不知今是非山林朝市事相  
違紫芝彊肉肥

怨王孫

漏悄人靜星稀雲淡煙柳成眠露蓮半頷何處月色飛  
來滿樓臺微風入袂仍吹領愁都醒好箇清涼境紅  
塵日迴河漢應有仙槎待還家

鷓鴣天

題梅花圖

玉骨冰肌萼綠華騎龍飛下太清家衣飄碧落星芒動  
珮拂玄冥月影斜江水闊嶺雲奢香魂散作歲寒葩  
畫圖驚見春風面陡覺精神冷不邪

醉花陰

夏日

溽暑炊人肌骨軟夢繞南柯遠驚起却依然碧樹連天  
風雨溪山晚 人間已自成疎懶事往誰能挽去去紫  
芝翁白石清泉日夜青苔滿

滿庭芳 二月十一日壽石末公

嶽氣鍾嵩星精降昴五雲光映麟書綠明紅媚風暖日  
長初金翻斜開洞府羣仙擁翠佩瓊裾收拾盡乾坤清  
淑為瑞在扶輿 文韜兼武畧南陽諸葛東海穰苴有  
貌虎龍蛇深護儲胥制勝不妨談笑鶯聲裏旗影徐徐

行看取非熊應兆沙路輾高車

醉花陰

樓外斜陽低半樹雖好難留住樹裏有鳴蟬似訴中情  
哽咽風前語碧雲不見蓬萊路青鳥今何處莫更倚  
闌干愁上心頭無計推他去

如夢令

題畫

草際斜陽紅委林表晴嵐綠靡何許一漁舟搖動半江  
秋水風起風起擢入白蘋花裏

南鄉子

八詠樓作

鳴雨過庭除病骨峻增不自扶強倚闌干成小立蕭疎  
立困依然作宰予驚覺失華胥樓外青山落照餘誰  
似莊周能化蝶蘧蘧心上閒愁一點無

踏莎行

冷雨籠晨淒風催晚杜鵑哀怨黃鶯懶蛛絲柳絮總輕  
狂可憐春去無人管碧草連天青山遮眼側身四望  
腸千斷愁如溪水暫時平雨聲一夜依然滿



摸魚兒

金陵秋夜

正淒涼月明孤館那堪征雁嘹唳不知衰髮能多少還  
共柳絲同曉朱戶閉有瑟瑟蕭蕭落葉鳴莎砌斷魂不  
繫又何必殷勤啼螳絡緯相伴夜迢遞樵漁事天也  
和人較計虛名枉誤身世流年衮衮長江逝回首碧雲  
無際空引睇但滿眼芙蓉黃菊傷心麗風吹露洗寂寞  
舊南朝憑闌懷古零淚在衣袂

點絳脣

雲淡秋霄夜寒月過軒窗同雁聲相應人語長廊靜

欲寄離情夢短天涯永休臨鏡舞鸞孤影怕見菱花冷

眼兒媚

烟草萋萋小樓西雲壓雁聲低兩行疎柳一絲殘照數  
點鴉棲春山碧樹秋重綠人在武陵溪無情明月有  
情歸夢同到幽閨

更漏子

詠雁

塞門雲湘浦樹畢竟故鄉何處楓葉渚蓼花磯水深矰

繳稀 蓬萊闕扶桑島極目茫茫烟草蘆荻老稻梁空  
月明江上風

怨王孫

翠被夜冷碧梧風勁蛩語將闌鴉棲不定開戶月在枝  
頭恰如鉤 煙波縹緲瑤臺路人何處黃葉連天雨夢  
魂此際繞盡越水吳山白雲間

謁金門

風嫋嫋吹綠一庭秋草天際夕陽無限好斷腸芳樹老

塵世茫茫難料有酒便須傾倒落葉滿階從不掃醒  
來新月皎

鷓鴣天

窗外羣蛙久不鳴夜來忽聽滿池聲客心且喜逢冬暖  
天意猶當放晚晴塵勞事莫關情清風皓月共忘形  
天桃應妬芙蓉色故發鮮花照眼明

驀山溪

簷鈴風過昵昵閨中語月上海東峰冷光浸澄清玉宇

幽人此際輕步繞回廊蛙鳴沼鴉翻樹露滴松梢雨  
蘆花漸老也學楊花絮袞袞趁流塵半沾泥半飄陌路  
不須看覷且自買芳尊已覩曲婆娑舞醉飲朝還暮

長相思

霜華清月華清清逼衾裯冷似冰那堪砧杵聲雞已  
鳴鐘又鳴天意憐人還有情如何不肯明

長相思

雁南歸人未歸寒信先來家信遲容顏只鏡知曉風

微曉星稀正是愁闌欲睡時  
隣雞莫要啼

臨江仙

予在江西時與李燿以莊善以莊嘗賦詩有曰淚  
如霜後葉撼撼下庭柯鄭君希道深愛賞之今鄭  
君已卒以莊與予別亦二十年夢中相見道舊好  
覺而憶其人不知今存與亡因記其詩屬為詞以  
寫其悲焉

街鼓無聲更漏咽不知殘夜如何  
玉繩歷落耿銀河鵲

驚穿暗樹露墜滴寒莎  
夢裏相逢還共說五湖烟水  
漁蓑鏡中綠髮漸無多  
淚如霜後葉撼撼下庭柯

憶秦娥

風淅淅月明何處吹長笛  
吹長笛拂雲來雁連天蘆荻  
繁華過眼成今昔  
滄波浩渺空潮汐  
空潮汐淡烟哀  
草六朝陳迹

蘇幕遮

白雲山紅葉樹閱盡興亡一似朝還暮  
多事夕陽芳草

渡潮落潮生還送人來去  
阮公途楊子路九折羊腸  
曾把車輪誤記得寒蕪嘶馬處  
翠管銀箏夜夜歌樓曙

蝶戀花

蔣山寺十月桃花

度朔移來天上種絳葢丹趺  
王母親曾弄青女素娥為  
侍從嬋娟獨擅三千寵  
回首歡娛誰與共荒草殘烟  
冷落秦源洞闌苑風高迷彩鳳  
斷魂飛入韓憑夢

過秦樓

暖日蒸紅濃煙烘黛又過一年春  
半鸞啼鏡掩桂老蟾



孤芳草為誰如剪何處燕子飛來入幕穿簾似曾相見  
問前朝王謝風流安在雪消冰泮還記得翠幄籠花  
瓊闌搭柳鳴佩響和清管圓光易缺急景難追回首夢  
迷天遠綠蔣青蘋是他玉樹亭臺金蓮宮苑且高歌對  
酒趣取韶華未晚

踏莎行

雨過山明煙生川媚佳人初把羅衫試玉驄嘶入柳陰  
中濛濛淡日蒸花氣簾幕低垂闌干獨倚一池春浪

魚鱗起暮寒寂寞掩重門怕人問道歸期未

隔浦蓮

朱簾不捲晝雨弱柳愁千縷事與孤鴻去空相憶同誰  
語雲水迷翠羽人何許玉佩沈湘浦悄凝竚春風到  
處白蘋香滿洲渚淚篋自老目盡野田平楚未用天涯  
悵間阻回顧斜陽猶在高樹

生查子

惜花

東風為愛花著意吹原野穠豔正堪憐何忍輕吹謝悶

損玉樓人獨立花枝下微睇歛雙蛾紅淚和花灑

江神子

春晴楊柳鬱金絲有黃鸝在高枝正是佳人無語倚闌  
時不理雲鬟尋斷夢消瘦損雪膚肌 海棠飄玉燕交  
飛草芳菲水淪漪怕見輕蜂小尾撲香歸滿鏡容顏憑  
酒染還慘淡對斜暉

滿江紅

風淡寒輕又還是清明時節幾處處莓苔鋪繡碎紅堆

纈滿樹綠陰堪止渴漫山黃霧松花發背畫闌獨立檢  
韶華聞啼鴉懷往事空淒切思不斷腸千結想繁華  
一瞬夕陽明滅玄武湖邊楊柳月雞鳴埭上棠梨雪到  
如今何處覓遺蹤泉聲咽

江神子

絲絲纖雨織黃昏掩衡門黯消魂贏得滿頭華髮照乾  
坤天上神仙三島外空虎豹守重閤河林落日隱崑崙  
崑崙望中原杳漫漫白葦青蒿無處著啼猿鳳去不來簫

管咽心裏事共誰論

長相思

桃花開李花開小白長紅越女腮  
春風巧剪裁蜂徘徊蝶徘徊  
飲遍清香未肯回莫教飄綠苔

憶王孫十二首

集句

花明柳暗繞天愁趙女乘春上畫樓  
樓上黃昏欲望休月如鉤檻外  
長江空自流

亂山凝黛色高低江雨霏霏江草齊  
三戶無人自鳥啼

綠楊堤笑殺山翁醉似泥

遠書歸夢兩悠悠閒倚南窗盡日愁  
手捲蝦須上玉鉤  
淚難收紅葉相隨何處流

盧家少婦鬱金堂日日春光鬪日光  
勾引花枝笑凭牆  
暎垂楊不是愁人亦斷腸

當時我醉美人家肯信流年鬢有華  
海燕西飛白日斜  
對殘花莫怨春風當自嗟

情愁無意整花鈿萬事傷心在目前  
錦瑟無端五十絃

月明天繡被焚香獨自眠

濕雲如夢雨如塵客舍青青柳色新一片花飛減却春  
勸行人莫向天涯金繞身

郎心如妾妾如郎一度相思一斷腸塵滿金爐不炷香  
向斜陽離恨空隨江水長

為誰零落為誰開小白長紅越女腮漸老逢春能幾迴  
看花回一日須傾三百杯

水紋如縠燕差池斜日悠揚在柳絲故國平居有所思

倚闌時却是同袍不得知

鬱金蘇合及都梁不是金爐舊日香  
懶對菱花暈曉粧  
細思量欲話因緣恐斷腸

滿庭芳草易黃昏  
摘索花枝料峭寒  
坐見新池落舊痕  
憶王孫深院無人獨倚門

浣溪沙

集句

花壓闌干春晝長  
碧樓紅樹倚斜陽  
入門惟覺一庭香  
絕壁過雲開錦繡  
冰絲彈月夢清涼  
鸞歌鳳舞斷人



腸

浣溪沙

集句

沙渚煙銷翠羽空  
楚歌重疊怨蘭叢  
樹頭樹底覓殘紅  
三百年間同曉夢  
幾家臺榭鳳城東  
露桃猶自笑春風

青玉案

春思

昨朝出日今朝雨  
望不見愁來路  
徑滑泥深妨縱步  
美  
人何處花謝誰為主  
離絃不繫鳴箏柱  
但滿眼相思

淚如縷關塞迢迢音信阻千重雲水萬重煙樹心逐征鴻去

長相思

煙茫茫草茫茫人去人來來去忙滄江空夕陽  
鳬飛翔雁飛翔天路冥冥川路長月明蘆葦涼

生查子

集句

他鄉別故人拭淚攀楊柳此物最相思皎皎當牕牖留  
取作秋香出入君懷袖萬里故園心天地同長久

生查子

集句

青山欲暮時  
暝色生寒樹  
不那客愁多  
復送王孫去  
澗戶寂無人  
暗谷疑風雨  
耿耿夜何長  
月落聞津鼓

生查子

集句

開簾滿地花  
風起春城暮  
悲妾似花身  
暫向花間語  
落葉不歸林  
驚鳥從橫去  
獨立傍銀床  
點點回塘雨

生查子

集句

春風能幾時  
柳色看猶淺  
蝴蝶夢中飛  
跡與孤雲遠  
明

月照花枝入夜愁難遣形影自相憐不及銜泥燕

生查子

集句

新年舊燕歸似與羈魂語不見帳中人空見相思樹  
水上覓紅雲片片隨風去薄暮欲如何背泣西窗雨

生查子

集句

思君君未歸向夕千愁起雨淚忽成行  
滴滴空階裏垂柳覆金堤蕙草生閒地  
少壯莫輕年白日如流水

生查子

集句

愁多夢不成坐對銀缸曉輕袖拂花粧驚起雙棲鳥出  
戶獨彷徨煙裏看鴻小日下四山陰轉轉傷懷抱

浣溪沙

即景

語燕鳴鳩白晝長黃蜂紫蝶草花香滄江依舊繞斜陽  
泛水浮萍隨處滿舞風輕絮霎時狂清和院宇麥秋  
涼

青門引

晚春

數點松梢雨還被晚風吹住兔葵燕麥幾家春殘花斷

柳難記舊游處 斜陽滿目空凝竚  
鬢影三千縷是他  
枝上蜂蝶紛紛帶取韶華去

漁父詞五首

采石磯頭煮酒香長干橋畔柳陰涼  
歌歎乃濯滄浪來  
往煙波送夕陽

白鷺洲邊好月明賞心亭下暮潮平  
紅米飯紫蓴羹自  
是無愁過一生

江花江草兩悠悠隨意東西懶即休  
黃犬恨綠珠愁定

應不上釣魚舟

釣得鰯魚不賣錢  
覷引滿看青天  
芳樹下夕陽邊  
睡覺蘆花雪滿船

朝辭蓼渚暮蘆汀  
自有沙鷗伴醉醒  
塵世裏一浮萍  
不著羊裘動客星

賀新郎

愁思

碧秀天涯草怨王孫  
雕輪去遠玉驄嘶  
老風雨餘春無  
尋處絮亂花飛  
夢杳斷魂與行雲  
縈繞赤水珠沈迷象

罔暗塵深不見長安道今夜月為誰好  
他鄉事事傷  
懷抱更那堪荒煙暝靄晚虹斜照千里關山勞回首苔  
徑殘紅未掃又恐怕梧桐秋早王母宮中青鳥使想歸  
來已近蓬萊島竹葉酒且傾倒

如夢令

鶯啄垂圓黃透蜂抱碎芳紅皺睡起北窻風濃綠滿庭  
如酒回首回首想見那人消瘦

眼兒媚



芳草簾櫳夕陽紅鶯語綠陰中  
王孫何處碧雲千里青  
鳥無蹤  
玉笙吹落天邊月離恨滿西風  
忍將清淚化為零雨滴在蘭叢

虞美人

紅榴花下宜男草色與人俱好  
佳人重色愛新花只恐  
東風漸急夕陽斜  
豈知浮豔難長久  
看見花枝瘦  
窻晨啓怨花空不覺玉顏憔悴減春紅

玉漏遲

初夏

海榴花似火看看又見麥秋時候枝上鳴蜩斷續一庭  
金奏翠韶風漪未定看葉底明珠圓溜苔徑黦蝦須掛  
處有人消瘦 緬想那日歡娛是鴻雁來初芙蓉開後  
蔓草青蕪但覺暗愁依舊欲把相思寄與霧煙慘不堪  
回首凝望久寒鴉自啼疎柳

踏莎行

破暖輕風做寒細雨冥冥飛過空江去客中無物可消  
愁綠陰滿院黃鶯語 琴斷朱絃香銷翠縷連天碧草

人何處欲乘斜日望長安傷心煙浪迷南浦

菩薩蠻七首

集句

洞房昨夜秋風起江清露白芙蓉死豈是遠行時與君  
生別離 千山鳥飛絕隆想彌年月思婦夜鳴砧君聽  
空外音

東風吹綠瀛洲草去年人到今年老老去願春遲凋傷  
感所思 攀枝長太息倚樹疑無力正是憶山時愁容  
鏡獨知

文窗繡戶垂羅幙江南綠水通朱閣花髻玉瓏璁單衫  
杏子紅高樓悲獨守日色濃於酒不敢怨春風屏幃  
向月空

珠簾暮捲西山雨離魂不散煙郊樹暝色赴春愁行藏  
獨倚樓玉繩迴斷絕卧見雲間月悄悄夜寒生月高  
風滿城

東流江水西飛燕黃姑織女時相見見少別離多浮生  
能幾何梧桐相待老常恐秋風早萬恨在蛾眉傍人

那得知

東邊日出西邊雨孤帆夜發瀟湘渚雨浪細無聲烟斜  
月轉明清猿不可聽楓落吳江冷更欲向芳洲水深  
難急流

孤雲目斷蒼梧野無邊落木蕭蕭下茲歲已蹉跎其如  
芳草何玉階生白露病骨傷幽素夢好更尋難相思  
錦帳寒

浣溪沙

即景

雲壓斜暉照樹黃  
風生水榭綠陰涼  
渴蛙得雨開池塘  
紅焰射人榴火炫  
青絲窈地柳條長  
捲簾明月滿迴廊

菩薩蠻

集句贈野人

林中獨酌鄰家酒  
門前學種先生柳  
灌木自悲吟風泉  
清道心獨行潭底影  
蟬噪林逾靜  
渡口欲黃昏  
殘陽歸掩門

浣溪沙

布谷催耕最可憐  
聲聲只在綠楊邊  
夕陽江上雨餘天  
滿地蓬蒿無舊陌  
幾家桑柘有新煙  
戰場開盡是何年

卜算子

春去蝶先知  
花落蜂難綴  
草綠庭空不見人  
愁共天無際  
鑿沼種荷看水淺  
荷錢細惟有青苔最可憐  
欲上人衣袂

金錢子

五月五日作

雲淡風微江雨欲來還去倚闌干髮霜千縷白水青蕪  
是征鴻歸處望盡天涯夕陽猶在深深樹 艾葉榴花  
又上阿誰門戶悄空梁燕雛自語王謝亭臺杳不知何  
許獨立蒼茫亂鴉啼滿城鐘鼓

梁州令

雨過羣山翠楊柳含烟如醉畫簷雙燕引雛飛風動榴  
花點點猩紅碎 對花莫抱闌干倚心亂難為理夕陽  
江上滿眼清波總是愁人淚



最高樓

今宵月還照別離愁愁上最高樓  
九霄無路青冥闊玉京風露冷於秋  
寶刀裁不斷水東流誰知道黃梁炊  
未熟早過了洞天三十六塵土事幾時休  
廣寒桂樹清香好圓光恰滿又成鉤  
笑階前萱草浪語忘憂

花犯 秋夜

夜何其星移漏轉涼蟾照無睡  
寶箏絃斷金雁與青釭相對憔悴  
塞鴻過盡人千里餘香怨繡被但滿  
眼碧雲

紅樹闌干空自倚 階前暗蛩最殷勤悽悽似向我說  
他情意莎露冷相將到曉霜開蓋惟應有素娥未老曾  
幾見桑田成海水任浪語愁來堪遣君看明鏡裏

西江月

紅葉無風自落黃花過雨猶香床頭塵甕恥空觴添了  
愁城萬丈 閱世身如萍梗懷人夢遠瀟湘應知此恨  
不尋常豈在眉間目上

卜算子

詠雨

撼撼度蓮池漠漠昏松隴却過西園拂紫塵柳媚花矜  
寵泥潤燕衣沾粉膩蜂須重極目滄江不見人波浪

兼天湧

蝶戀花

春夢岑岑呼不起草綠庭空日抱嬌鶯睡暖吹飄香三  
萬里殘絲罨斷天沈水寶瑟絃僵誰復理梅子青青  
苦在心兒裏滿徑蒼苔花慘地杜鵑口血閨中淚

誠意伯文集卷十一

欽定四庫全書

集部

誠意伯文集卷十二

詳校官庶吉士臣范逢恩

中書臣劉源溥覆勘

總校官編修臣王燕緒

校對官編修臣秦泉

謄錄監生臣秦鴻甲

欽定四庫全書

誠意伯文集卷十二

寓情集二

摸魚兒

晚春

悄寒生沉沉院宇不知春在何處逢春漸老能多少惟  
有暗愁無數春又暮但碧草和煙綠葉漫飛絮畫梁燕  
語還是舊音聲烏衣巷陌轉盼幾今古天涯路流水

明劉基撰

青山如故離魂長在郊樹夜深月暗蒼梧遠化作杜鵑  
歸去人不見桃花自落空階上東風未許吹夢過藍橋  
關河滿目波浪渺南浦

玉樓春

春來觸處花成綺春去可憐花委地催耕布穀彊知時  
去國杜鵑空有淚雙魚不見人千里落絮牽愁和夢  
起芭蕉多事惹東風故作雨聲驚客耳

惜餘春慢

詠子規

隴水沈沙已猿咽雨淚盡瀟湘竹死多情怨魄何處飛  
來聲在萬重雲裏腸斷行吟放臣去國佳人地遙天邇  
悄空山月冷風清惟見野棠如綺 記向日瓊戶珠簾  
櫻唇簧舌吹商呵徵朱顏尚在十二闌干回首不堪重  
倚滄海桑田有時海若未枯愁應無已到明朝贏得浮  
花滿樹錦殷霞碎

金人捧露盤

水如藍山如黛草如絲正去年雙燕來時衡門晝掩日

長惟有睡相宜午風吹破北窗夢簷影參差 李花開  
梅花謝榴花放杏花稀枉教人兩鬢霜垂馮闌竝立空  
將愁眼盼斜暉斷雲迢遞趁征鴈直到天涯

水調歌頭

雨過百花盡綠葉自成帷翛然驚破殘夢何許一黃鸝  
獨上高樓凝望不見陽春去處惟見草離離且喜畫梁  
燕還傍舊巢歸 理紈扇清竹簟試單衣莫思身外閒  
事有酒便須揮螻蟻王侯同盡何用名標竹帛留與後



人疑坐久暮天碧月在綠楊枝

玉樓春

江城雨熟黃梅後樓閣清高虛永晝階前夕露寶珠呈  
葉底夜蟬金石奏蒼苔不受殘紅覆市徑沿牆欺組  
綬老來於物總忘情漫為青山開北牖

歸朝歡

紫燕成雛辭舊宇紅日滿庭鷄唱午披襟起遡北窻風  
綠楊葉底聞鶯語故人音信阻白蘋吹盡滄江雨倚闌

千悠然獨笑暝色下平楚  
浮生百歲真羈旅富貴繁  
華萍梗聚重瞳隆準等丘墟  
紫髯桑蓋俱塵土坐來天  
欲暮烏鴉立遍城頭樹看  
雲頭金盤湧出身在廣寒  
府

傳言玉女

詠蝶

為問韓憑何事化為蝴蝶  
妬風羞雨一身輕似葉園  
苑書永麗日晴烟相接舞  
回柳眼拍翻花頰  
殢粉迷香  
困酣猶自未愜錦雲深處  
更愁濃露浥何況素秋枝  
上  
曉霜披鬣祗應無奈翠銷  
紅厭

好事近

雨過却斜楊虹外遠山猶濕獨據檣梧高坐待北窻風  
入 可人嘉樹有清陰蟬噪一何急倦暑盼秋來又恐  
芳時輕戢

虞美人

東風過了南風起節去如流水日長門掩燕交加可惜  
紅葵落盡雨中花 人間只願花長好花謝人催老老  
來空有愛花心無奈斜陽不為駐光陰

訴衷情

相思日日上高樓還是去年秋無情梁上雙燕棄我忽  
如讐蟲嘖嘖葉颼颼夜悠悠闌干漫倚塞北江南何  
地無愁

御街行

秋夕

梧桐滴露鳴金井夜耿耿如年永月明棲鳥數移柯有  
似佳期不定華年迅速碧霄迢遞別恨空心領青鸞  
怕見單棲影任網遍盤龍鏡盈盈一水隔雙星腸斷羽

迷鱗暝消愁憑酒惟應無奈酒與愁同醒

浣溪沙

槿花

可恠西園木槿花強將孤豔鬪輕霞不知門外夕陽斜  
應有斷魂隨蛺蝶豈無悠恨寄寒鴉那堪橫被綠苔  
遮

玉漏遲

詠鴈

渺長空萬里西風動地鴈來無數早發榆關暮入楚江  
烟雨逝水浮花去遠但滿眼黃蘆飛絮腸斷處雲深夢

澤月寒湘浦 樓上有個佳人悶倚遍闌干翠眉雙聚  
淚濕鴉鬟化成素絲千縷一望一回惆悵又燈暗網蟲  
垂戶天路阻誰知此情愁苦

滿庭芳

重九

雨歇涼生天高氣爽又是一歲重陽鴈聲來處雲白草  
茫茫黃菊知人無酒也不惜槭死幽芳龍山上西風暝  
靄落日下牛羊 登樓何限興一齊分付絡緯寒蟬把  
古今閒事莫更思量坐到銀河案戶城角盡月轉空牆

凝眸久驚烏蜚起零露濕衣裳

花心動

牆下紅葵向斜陽猶開那時顏色半捲繡簾獨倚雕闌  
淚眼為誰長滴九疑煙霧連蓬島蜚魚去渾無蹤跡舊  
游處空餘滿地綠苔堆積百歲真如過客待落盡重  
榮不知何夕鏡掩素塵香歇羅衣此恨怎生消得夜涼  
月轉梧桐影青燈共踈螢寥寂正憔悴飢蟲又啼暗壁

小重山

詠月

始暎西軒似玉鉤想應容不得一些愁娟娟斜倚鳳凰樓窺朱戶應自半含羞今夜正悠悠玉池金岸總是瀛洲人間天上一般秋銀潢水何事獨西流

一剪梅

機杼無聲絡緯多天淨雲收月在銀河相思迢遞隔關山雁短人遙可奈何身世悠悠似逝波夢裏嗟咨鏡裏婆娑欲回西日掛扶桑惆悵陽公不解揮戈

南柯子

詠梨花



汀苕青絲盡江蓮白羽空翠蕤丹粟炫芳叢總把秋光  
管領屬西風  
豔敵秦川錦鮮欺楚岸楓鯉魚却下水  
仙宮肯放斜陽更向若華東

如夢令

昨夜五更風雨吹盡一汀紅樹曠野寂無人漠漠淡烟  
荒楚日暮日暮誰與暝鴉為主

六么令

詠露

淡雲收盡月在蒼龍角霏霏似烟非霧空裏無聲落漢

殿仙人掌冷桂影篩高閣玄蟬皓鶴相呼相喚嗽嚙華  
滋笑丹藥寒蟄不分命薄永夜驚離索絡緯也共莎  
鷄吟盡傷心曲只恐韶年易晚辜負蓬萊約秋容寂寞  
憑君著意染取楓林賽紅萼

憶舊遊

詠燈花

正良宵過雨玉漏傳聲羅幌無風夢覺青釭裏有金葩  
璀璨瓊蕊瓏璵翠翹隱映丹鳳搖曳碧雲中似瑞靄含  
星輕霞暈月霽景攜虹離人最多感況四壁蕭條惟

有吟蟲想像長門殿怨佳期永泮芳意煙空強將片影  
相對清淚濕鉛紅但暗自灰心朱顏判却成老翁

聲聲慢

詠愁

無蹤無跡難語難言依依只在心曲雨冷雲昏日暮海  
涯天角輕衾夢回酒醒夜悠悠蟲響燈綠事去也縱相  
憐不是那時金屋鏡裏清揚婉婉凭朱檻知他為誰  
顰蹙鳳老桐枯慘淡九峯青矗湘江淚痕未盡有哀猿  
相伴幽獨向此際更那堪懷古送目

念奴嬌

紅樹

霜風弄巧把秋林一夜吹成春苑炎帝騎龍來絳闕紫  
鳳三千乘輦電幟揮雲火旗蕤雨榼佩隨瓊憶碧山流  
水宵然迷却劉阮堪笑舊日隋園綺羅虛剪蝶與蜂  
俱怨對此令人心耿耿如在鬱華宮殿若木重暉靡薢  
四照日漾驪珠暖憑高凝睇赤城相去不遠

採桑子

雁來不帶天邊信莫上高樓新月如鉤一度看來一度

愁人間無恨傷心事覆水難收風葉颼颼只是商量  
斷送秋

夜飛鵲

中天舊時月還照元宵山疊疊水遙遙碧雲日暮去無  
際玉人何處吹簫東風尚憐故苑儘鶯含脆管柳舞纖  
腰憑高望斷旋添清淚作春潮欲問廣寒音信鯨浪  
湧魚蜚不到層霄芳徑蒼苔漸滿瓊軒珠綴空掩蟪蛄  
幾時再得海棠花底候鳴鑣但長煙綠樹青蕪暝靄相

對魂消

賣花聲

門外綠楊堤有個鶯啼聲聲傳恨入幽閨閨裏佳人驚  
睡起淚濕眉低莫把此情題天也悲悽滄江東下夕  
陽西華髮不知人別苦隨意萋萋

阮郎歸 怨情

河梁携手愴離分悲嘶聲入雲長門疎雨滴黃昏  
昭陽歌吹聞懷故國叫愁魂淚花紅欲焚蒼梧苦霧壓湘

筠猿啼不見君

搗練子

烟漠漠日陰陰山色蒼茫草色深客裏不知春又半倚  
闌無語聽鳴禽

阮郎歸

寥寥庭館暮寒時四簷鳴雨垂博山沉水吐遊絲玉釭  
花燼微蟾影淺漏聲遲愁多成夢稀客行雖好不如  
歸有懷當語誰

賣花聲

樓上倚闌干月在雲端輕烟蜚盡碧綃寒腸斷夕陽芳草外山海漫漫  
柳嫩不堪攀欲寄應難盤龍塵匣怨孤鸞可惜嬋娟今夜月好共誰看

長相思

風颼颼雨颼颼風雨淒寒似九秋釀成千斛愁花事  
休春事休漫把花枝插滿頭勸春須少留

玉樓春



東風白下橋邊道不見百花惟見草陰雲結暝燕來難  
宿雨留寒春去早渚蒲汀荇無煩惱舞葉吹香隨處  
好相思一夜楚江空滿地綠苔蜂蝶老

醉落魄

東風太惡夜來盡把花吹落餘寒燕子烏衣薄對語空  
梁似歎人離索江山滿眼今非昨無情芳草年年綠  
霧雲不見遼東鶴野鳥聲聲只叫思歸樂

解語花

詠柳

依依旖旎嫋嫋娟娟生態真無比細腰宮裏和烟重組  
繪滿園桃李佳人睡起畫未了橫雲嫵媚輕步還憐掌  
中身不自勝紈綺長想渭城雨後恨繁絲難綰陌上  
征騎陽關歌罷香塵遠枉把翠柔折寄鴉啼向晚羅幕  
掩數行清淚一任他花作浮萍漂蕩隨流水

驀山溪

詠簷鐸

夜闌人靜鳴玉傳聲小歷歷透紗窻悄空閨衾寒夢杳  
淒淒切切如共旅魂言流水咽過雲停一日腸千繞

金莖月轉烏尾訛將曉欲斷又還連渺烟霄羈鴻相吊  
憑誰細寫此意入朱絲呼郢客招湘靈添作江南調

梅花引

晚雲凝晚烟橫烟草茫茫雲樹平杜鵑聲不堪聽別淚  
暗傾良宵空月明 水蠶絲斷琅玕折湘妃竹死青冥  
裂短長亭幾十程歸計未成愁隨江水生

浣溪沙

愁思

細雨斜風拂面來草黃雲白雁聲哀滄江東去幾時回

楓葉有霜纔可愛  
菊花無酒不須開  
百年多病莫登臺

憶舊遊

闌砧

掩重門夜靜庭戶幽幽  
驀地聞砧杵不知何處是雲間  
過響空外傳音故鄉未卜  
歸棲日薄愧飛沈漫對月興  
懷臨風起歎惻愴傷心  
登高盼來雁想此際孤幃幾  
度停針想帶圍寬減向誰人  
借問無計追尋但將數點  
清淚滴在紫羅襟更倚遍  
朱闌滿頭素絲應自今

浪淘沙

閨怨

白日墮林端  
庭宇生寒黃  
蘆風急雁來難  
階下露珠眉  
下淚相賽  
沈瀾  
寂寞掩重關  
坐到更闌月華雖好不  
堪看  
舊恨新愁都有幾  
地窄天寬

望江南

黃昏雨滴瀝  
四簷聲陡為衾裯添宿潤  
都來肺腑作愁  
城惟覺寐難成  
單棲鳥幾度繞枝鳴  
金獸有烟飛不起  
玉蟲無燄翳  
還明誰識此時情

搗練子

人寂寂夜沈沈風滿中庭月滿林欲挽銀河湔淚眼銀河清淺淚痕深

臨江仙

閨怨

織女機邊如鏡月夜深長照空幃玉笙簧冷鳳孤飛苔階行遍霜露剥裳衣華表柱頭雙白鶴不知何日來歸故山今在故人稀沈思似夢垂涕掩朱扉

尉遲盃

水仙花

凌波步怨赤鯉不與傳槭素空將淚滴珠璣脈脈含情  
無語瑤臺路永環佩冷江皋荻花雨把清魂化作孤英  
滿懷幽恨誰訴長夜送月迎風多應被彤闈紫殿人  
妬三島鯨濤迷天地歡會處都成間阻淒涼對冰壺玉  
井又還怕初寒凋翠羽盼瀟湘鳳杳篁枯賞心惟有青  
女

滿路花

山烟掠草低江月披雲濕柝聲宵未了鐘聲急寒鴉何

事獨在枝頭立老來諸病集客裏光陰駛如馳馬難繫  
懷新思故記一長遺十頽墉圍廢宇憑誰葺階前冷  
露似向離人泣歲暮蛟龍蟄干將掛壁任他苔鏽生澀

喜遷鶯

梅花

凍雲初啓看的皦梅花俯窺清泚膏澤無加鉛華不御  
應與素娥爭麗艷浥蘂宮露冷香引瑤池風細夜耿耿  
想飛瓊欲下縞衣搖曳驚慨猶記得月榭春宵錦障  
開芳砌倚樹聯詩擷英浮酒左右翠翹珠幌今日故人



何在腸斷白波東逝向此際但含情獨立為伊凝睇

水龍吟

夜聞銅鉶湯響作

玉缸開盡丹葩畫簷深宿蟾蜍影門掩清宵聲來何處  
堂空人靜如竹梳風如荷過雨如泉發井向羅幃細細  
如歌如語還如暗蟲相命 繡被沈薰正暖夢雲車紫  
鷄雙並洞庭曠野九韶齊奏殷天笙磬別有蛾眉鼓琴  
彈瑟江鳴山應待翛然睡覺爐存餘爇鷄啼窻間

雨中花

月入疎松光的皦淡烟瑣江城夜寂問何處無愁人間  
今古莫作他鄉客 月裏青鸞空有翼杳不見姮娥消  
息但北斗從橫銀河清淺重露成涓滴

菩薩蠻

冰漸著樹成雲朶林梢白月歆將墮月下啼鳥如悲  
良夜徂 蘭芳銷翠被淒惻驚眠起起坐待天明飛霜  
入鬢清

怨王孫

鱗羽路阻佳人何處木落山寒江空歲暮明鏡飛上青  
天照無眠海風裂地鯨魚死三萬里水擊蓬萊徙不  
禁清淚暗裏灑向孤燈結成冰

錦堂春

牆角含霜樹靜樓頭作雪雲垂鉤簾鵲噪空庭晚坐看  
月來時異域書迷雁足幽閨鏡掩蟲絲一宵兩地腸  
千轉惟有夢魂知

浣溪沙

烟慘雲黃天雨沙葉疎枝冷叫棲鴉峭風凝霧作琪花  
灋浦空捐遊子佩河源不返客星槎夜吟坐聽鼓三

過

玉燭新

夢歸

羈魂悲別久但悶曉憂昏感新懷舊任他萬壑千峰阻  
徑度不勞回首樓臺側畔記向日新栽花柳斜照裏一  
帶青山山前翠浮瓊溜佳人倩笑來迎有野舞村歌  
亂童鮐叟故池半甃風葉動攪亂數升科斗周章未了

早畫角吹殘更漏翻惹起無限愁端中心自受

臨江僊

樓外西風將雨過重門又掩黃昏金鳧香息被無溫繁  
思牽宿恨悵夢愴離魂往事都隨流水去傷心欲共  
誰論故家者舊幾人存相思芳歲盡霜雪滿乾坤

清平樂

春風欲到小草先知道黃入新萸顏色好圖遣王孫歸  
早興來策杖微行枝間布穀初鳴喜見兒童相報牆

根薺菜先生

錦堂春

鵲噪輕陰乍霽鳩鳴吟雨還來不知春到多時了  
渾未見花開老景夕陽有限華年逝水無回相思  
一夜蘭膏歇清淚滴瓊瑰

蘇幕遮

雨瀟瀟風嫋嫋柔夢相牽不覺春牕曉雁到衡陽  
回去了鏡裏離鸞獨對琴臺老  
楚天長秦樹杳山蹙愁眉

江學回腸繞滿地蒼烟連碧草弱水三千人隔蓬萊島

蝶戀花

白水茫茫烟渺渺原野高低觸處生芳草  
草綠花紅人自老有情爭似無情好  
喪亂餘身歡意少腸斷江山不肯留  
殘照門掩黃昏寒料峭角聲吹起雙棲鳥

洞仙歌

春夢

濛濛漠漠杳不知根蒂蕩漾春光去無際  
盼神仙縹緲烟藹蒼茫身到處惟有天風引袂  
故人千萬里驀地

相逢忘了關山路迢遞聚散未分明雨眩雲酣空回首  
已迷塵世但擁被追尋恍如遺惜不覺雞鳴若華東啓

風入松

一天烟靄愁陰庭宇沈沈晝梁燕子來何晚薄寒猶  
戀羅衾但道青春未謝不知芳徑苔深少年歡笑夢  
中尋落得傷心蒼梧鳳去幽篁死斷絃空繫瑤琴莫更  
登高望遠杜鵑聲在雲林

祝英臺近



問青青河畔草能得幾時好春去難留鏡掩鸞空老淒涼深院黃昏新愁陳恨趁風雨一齊來到霧雲香漫有千丈遊絲那堪繫殘照羅幙寒生哽咽子規叫斷腸只是緣愁柔腸數寸怎禁得許多煩惱

摸魚兒

斷腸花已隨流水青苔空鎖深院知人不似花重好莫恠為花留戀花不管任啼鳩悲鳴霞錦成霜霰水遙山遠淚滴翠綃寒滿天風雨寂寞送書雁傷心事縱是

生來見慣那堪芳歲先晚孤雲目盡蒼梧野留得竹枝  
歌怨簾幕莫捲斜照裏荒烟白草愁何限情長意短蟲響  
又黃昏沈沈夜永惟有月華滿

小重山

月滿江城秋夜長西風吹不斷桂花香碧天如水露華  
涼人不見有淚在羅裳何許雁南翔堪憐一片影落  
孤房百年浮世事難量空回首天闊海茫茫

點絳脣

昨夜三更井梧葉上聞鳴雨夢魂空去不到思量處  
為問燈花底向愁人吐花無語星河滿樹白髮三千縷

菩薩蠻

月華泛濫秋塘草羈蟲露泣芙蓉老空館夜聞砧難為  
客子心故鄉何處在雲白天黏海天海共蒼茫何時  
還故鄉

一萼紅

送別

白蘋洲有蘆花似雪人在木蘭舟祖帳方開驪歌未闕

斜照半入江樓話不了  
纏綿意緒早歸鴻相喚落沙頭  
紅蓼丹楓青烟碧草總為供愁  
此去幾時重見悵穠華  
易謝零雨難收洛浦波空渭城柳盡欲飲還又回眸  
恨只恨無情海水趁歸風輒向西流畢竟難留一宵長  
似三秋

生查子

蜘蛛網畫簷一日絲千轉  
紅燼落寒缸心死無由見  
湖上采蓮歸苦意知何限  
引領望佳期征旆天邊遠

霜葉飛

簾涼宵永紗窗外琅玕飄墜金井欲眠深恐寐難成疆  
起看星影悄不覺天回斗柄封狼弧矢相輝映對此默  
消魂又露落青冥漸漸濕透衣領 河漢有客乘槎清  
都非遠可惜魚羽無定桂華吹散廣寒風兔老蟾蜍冷  
但唧唧飢蟲啼暝中心撩亂誰能整坐待雄雞三唱颯  
颯霜髭怕臨青鏡

浣溪沙

半畝荒園自看鋤雨中時復擷新蔬不須彈鋏歎無魚  
早息機心勞役少懶聞世事往來疎清風明月總贏  
餘

擣練子

雲淡淡月娟娟雲月朦朧照不眠寧是不眠休作夢夢  
時歡喜覺時憐

擣練子

吳苑樹楚江楓一樣秋光兩不同莫道衰榮長定在落

花終古怨東風

江神子

城頭吹角夜沈沈有棲禽出疎林衝落滿庭珠露滴衣襟  
身在吳江家在越南北事兩關心人生莫遣二毛侵  
病相尋老駸駸漫好青山綠水懶登臨千古鍾期今已矣  
空慘愴對瑤琴

南柯子

送別

送別滄江永傷心落日曛寶箏絃斷雁離羣最苦愁濃

酒淡不成醺 黃葉淒涼月丹楓索漠雲重來此地却  
思君但覺驪歌猶在耳中聞

桃源憶故人

淵明籬下黃金蕊還共空尊憔悴今古這般滋味想得  
都相似 牛山落日悲風起回首舊歡無幾長夜清涼  
如水獨立星河裏

六么令

杪秋遙夜人卧羣喧息明河漸低庭戶戶有蟪蛄織何



許飛來雁陣衝入寒烟碧相思何極悲來空自目斷雲  
霄羨歸翼青鐙獨照暗壁脉脉羈魂寂堪恨冷夢難  
長欲見無由得年少不知過了老去徒嗟惜追尋  
愁如流水渺渺茫茫趁潮汐

一剪梅

征雁來時木葉紅  
淡淡秋光嫋嫋西風  
江南江北短長亭  
烟草低迷落照中  
浮世生涯一轉蓬  
今日韶顏明日衰翁  
五丁難挽逝川回  
千古英雄此恨都同

蝶戀花

冷雨淒風昏白晝  
庭院幽幽秋草沿牆秀  
何處無愁仍有酒  
可憐彭澤門前柳  
老去情懷難似舊  
貌異言殊轉使人看醜  
漫摘黃金花在手  
寒烟滿眼空回首

浣溪沙

詠雞冠花

絳幘雞人紫綺裘  
彤墀欲報五更籌  
不勝嬌冶立清秋  
日影却穿雲氣入  
虹光猶帶露華流  
三千紅粉總凝眸

風流子

詠草

雪盡水平津萋萋處風景最愁人想金勒未歸繡幃深  
閉玉顏自老芳意徒新送日挽烟千萬里迤邐際蒼旻  
蜀魄叫迷楚魂思殢碧雲如夢眉黛空顰淒涼長門  
殿飛花與清淚共滴華茵惟有亂螢時來夕砌相親恨  
此身不化柔條弱蔓暗隨靈雨得到楓宸窻掩黃昏一  
生幾度青春

蘭陵王

問明月何苦纔圓便缺青冥裏風慘露淒長向人間照  
離別玄陰凋暮節瑤井冰漸暗結闌干外河漢漸低星  
影輝輝動城闕重裘冷如鐵看頭上春雲都作飛雪  
銀缸花落銅壺咽傷懷已無奈暝鴉多事啼遍寒枝未  
肯歇寸心自摧折忉怛望天末恨正抵滄江烟浪空  
闊文魚翼短沈書札淚滴在衣袂盡成清血羈愁恰似  
庭草枯了又更茁

踏莎行

詠遊絲

弱不勝烟嬌難著雨如何綰得春光住甫能振迅入雲  
霄又還旖旎隨風去高拂樓臺低黏花絮如狂似醉  
無歸處黃蜂粉蝶漫輕盈也應未敢窺芳樹

青門引

采采黃金蘂遙見晚山橫翠重門深掩一庭風沾來淡  
酒能得幾回醉草黃雲白鴻千里落日寒烟起相憐  
自有明月照人肺腑清如水

浣溪沙

不寐淒寒剥瘦肌聞鐘驚起攬裳衣恰如久戍得歸時  
斜漢隔山牽月落小禽出樹掠霜飛濛濛輕藹暈朝  
暉

浪淘沙

門外幾多春特地愁人紅英都作馬蹄塵只有青青河  
畔草一似相親極目楚江濱流水無津野獺山鳥怨  
芳辰呌雨呼雲昏復曉天也傷神

疎影

分韻詠荷花得實字

琴薰應律有細烟冒雨濃露晞日洛浦波生湘渚風交  
霓裳水珮爭出姮娥欲共青鸞舞颺錦幕香霏紈質喚  
海童齊捧驪珠艷色蕩搖鮫室遙想麻姑壇上翠霞  
與縞袂相伴蕭瑟妖冶珊瑚柔媚昌宗敢污天然清謐  
西峰玉井秋河近看葉底蜂房成蜜為君摘向金尊壓  
倒楚江萍實

花心動

烟雨池塘盼花枝垂垂向人如泣燕子乍歸簾幕餘寒

語困畫梁雙立曉光搖帳驚眠起鶯簧猶澁斷腸處絲  
繁絮亂子規聲急只恐芳時易戢便不待秋風粉銷  
香浥半掩綺窓深鎖重門天靜月華將入素琴彈盡離  
鳳調淒風與愁雲交集夜迢遞羅襟舊痕又濕

卜算子

白日下層岑青靄生寒水水遠山長不見人月上風微  
起何許一孤鴻飛去瀟湘沚欲採蘋花寄所思無處  
尋雙鯉



瑞龍吟

秋光好無奈錦帳香銷綉幃寒早鉤簾人立西風送書  
過雁依然又到故鄉杳空把淚隨江水夢縈池草何  
時賦得歸來倚松對柳開尊醉倒哀鬢不堪臨鏡鏡  
中愁見蓬飛絲繞門外遠山青青長帶斜照石泉澗月  
辜負夜猿嘯傷心處楓凋露渚荷枯烟沼燕去玄蟬老  
滿天細雨鳴羈鳥花蔓當簷裊庭院靜遙聞清砧聲擣  
擁衾背壁一燈紅小

渡江雲

西風吹楚甸。四山淨綠，萬籟起秋聲。捲簾當晚，霽倚遍  
闌干，慘惻望鄉情。紫桑舊菊，爲誰猶擢金英。愁對他一  
江流水，衮衮向東傾。淒清天邊孤雁，甚處飛來到中  
庭。落影雲路遙歸程。難計離恨空縈。斜陽冉冉低喬木  
但暝色搖動簷楹。還又見花間露滴瑤瓊。

帝臺春

涼雨新沐。秋花遍牆角。門對遠山，山帶斜陽。蔥蘢相屬。

明月今宵已自滿又爭奈素娥幽獨向天涯望月興懷  
愁多如簇年歲促歡去速意易足事難續鏡掩懶重  
開縱春風也不鮮染黃成綠隴首孤雲去無際草上露  
華白如玉且深下紅簾倒金樽醺醖

浣溪沙

嫋嫋西風吹草黃踈踈零雨泣花粧驚寒鸚鵡喚人忙  
雁影兩行衝月落蟲聲一部和更長博山煙冷思茫  
茫

千秋歲

送別

淡烟平楚又送王孫去  
花有淚鶯無語芭蕉心一寸楊柳絲千縷  
今夜雨定應化作相思樹  
憶昔歡游處觸目成前古  
良會知何許一盃桑落酒三疊陽關句  
情未了月明潮上迷津渚

驀山溪

三更鳴雨濕透桃花臉  
珠箔未登鉤早飄落猩紅數點  
碧雲如夢人去已無蹤  
金泥鳳玉蟠龍寂寞蛛絲檢

玄華柔軟總被秋霜染夜擁寒衾耿青鐙膏凝暈閃銅  
壺漏水應是接天河一聲去一聲來空把重門掩

長相思

嘉興道中

草青青麥青青草穗高低麥穗平黃花相間明 山禽  
鳴水禽鳴禽鳥與人同有情不堪聞此聲

浣溪沙

春半江城不見花也無楊柳可藏鴉青煙碧草到天涯  
過雨郊原啼布穀始雷池沼出鳴蛙清明寒食客思

家

摸魚兒

洒軒窗數聲疎雨霎時驅退殘暑碧江風過龍鱗起天際白雲如絮人老去但說道秋來先自傷心緒故鄉何處望不見淵明菊荒三徑盡日漫凝佇新涼夜兔影澄清漢渚寥寥鴻雁飛度莎雞絡緯閒相妬催得鬢絲千縷芳草渡還又是蒼烟綠水連紅樹榮名幾許隨分莫求多五湖有路波浪未應阻

祝英臺近

翠烟收珠露下星漢共瀟灑桂影徘徊白雪粲簷瓦故鄉渺渺青山茫茫綠水又爭奈流年如瀉嫩涼夜尚有萱草餘花芳菲臺榭銅篆香殘絳蠟散輕燄漫說花解忘憂憂多花少更不分被風吹謝

怨王孫

兔魄又滿天長雁短露槿驚寒夜蟬怨晚知有多少閒愁在心頭白雲飛盡秋無際花滿砌鐘鼓重門閉前

年舊事轉盼已逐東流水悠悠

二郎神

捲簾邀月漸夜永涼生珍簟看露出青莎煙凝碧樹的  
皦殘螢數點老景逢秋兼多病怎免得長懷短念辜負  
却故園千山松桂一池菱芡門掩寂寥滿地餘花紅  
糝睽翠被香收玉觴塵浣背壁蘭缸自閃馬角不生烏  
頭難素心侶風旌長颭休怪他敗葉寒蛩相應替人悽  
慘



霜葉飛

七夕

鯉魚風起津梁斷盈盈一水難渡藕花相向自成蓮誰  
道中心苦又不覺明星在戶鵲橋橫跨黃姑渚怕喜極  
悲生似那日匆匆再把歡笑辜負堪恨桂闕姮娥乘  
雲驂霧便踏龍尾先去碧雞啼罷鳳樓寒早漏聲催鼓  
盼油壁香車駕了踟躕欲上頻回顧但暗滴真珠教向  
人間散成飛雨

少年遊

清風收雨輕雲滿月涼氣入幽窻亂葉吟朝飢蟲啼夜  
各自奏新腔孤鴻又向天邊落歸夢阻滄江百結愁  
腸兩行絲鬢寂寞對清缸

小重山

說道多憂解瘦人眼中雙別淚怕沾巾白蘋紅蓼滿江  
濱空搔首何處是歸津感舊却怜新情懷都不似少  
年春野花園柳共埃塵盈尊酒取醉莫辭頻

漁歌子

為趙德懷賦

麥秀蘄蘄野雉飛沙頭新柳葉如眉風澹蕩水連漪正  
是溪魚上釣時

二月桃花紫錦香一聲啼鵝萬蜂忙歌歎乃濯滄浪有  
酒無愁醉不妨

烟雨樓前溪水生少微山下雜花明楊柳岸小舟橫綠  
陰如幄聽啼鶯

漠漠風花撲面飛萋萋烟草送人歸彭澤菊首陽薇白  
酒蒼苔獨掩扉

雨聲一夜水漫沙垤鵲長鳴蟻出窠汀荇葉石榴花隨  
意漂流擁釣槎

蒼嶺松花結子成南明山色翠相迎游客思故人情不  
是陽關墮淚聲

三寸時魚碧玉鱗滿汀芳草綠羅茵楓葉渚荻花津笑  
殺黃埃馬上人

滿庭芳

清明

積雨沈春昏烟酣晝不知還又清明榆錢柳絮相逐鬪

輕盈芳徑莓苔漸滿青蘋與白芷俱生疎籬畔海棠間  
竹有箇鶉鳩鳴 寬心應是酒酒衝愁陣彊似奇兵愛  
星星白髮知我生平底用登樓看鏡誤身世只是虛名  
空凝佇落花如雪雲霧鎖高城

誠意伯文集卷十二